

歐

北

集

甌北集卷十八

起辛卯八月
至壬辰二月

陽湖 趙翼 耘秋

珠江用東坡發寶州韻

水減珠江漲征帆縱所如路多曾歷過

水路從粵西
多番所經地

官豈更

求餘計俸虛糜久攜家惜別初烟波何浩渺聞看罟師漁

三水送舍弟奉太恭人北歸

畫舸行還泊依依送別情江流將判路宦跡亦分程南
國梅難寄西風桂正榮古人親在日息意事躬耕
廣州稱善地未敢爲身謀漫有雙輪鹿惟堪十具牛養
親須洗腆教子莫聞咻不用規知足將歸奉白頭

端溪

扁舟晚泊羚羊峽口閒訪端溪古石叢前邨呼取老石工
爲余指點述縷縷是山到處有硯材文殊宣德皆凡胎
屏風背下穴三尺乃是水巖宋所開其中東洞勝西洞
洞內又分三層縫上層麓燥下層腐尤以中層爲貴重
雲氣水氣入石濡石亦化作雲水腴切以鸕鶿刀一片
磨以蚌蛇砂幾銖嫩於三歲嬰兒膚手一握之汗若酥
殺墨乃如磁吸鐵研磨無聲雲白敷數日不散光黯黯
宿墨一洗仍了無斯爲品中最上上鵲斑鵝眼猶皮相
青花隱約差可憑火捺有無不足尙近來此坑亦漸空
非有大力難施功剡水先費千人力入寶要瘳七尺躬

燈燈在臍仰面繫一卷艱與尺蠖同人間無此嗜奇之
豪客當道無此好事之鉅公黃岡邨民家賣硯乃是贗
質欺愚蒙我聞其言一笑歌此州官場物力夥旣弗沾
漚餓齏桑又莫餽遺粳飯顆何不結此翰墨緣洞天割
取紫雲朶雖殊包老投石沉清泠差比鬱林歸裝壓磊
柯

努灘

疊疊危磯矗江心截急渦千尋鍊交鎖十萬劍橫磨篙
逆濤頭刺舟穿石罅過灘名應記取努力慎風波

柳州

我聞吳中桑民懌得官不赴柳州城謂昔子厚擅其地

去恐掩却前人名斯言抑何過自譽母乃虬蟄撼大樹
昔者東坡到嶺南未聞潮州祇韓愈將母自揣實不如
翻作大言高自署名士取名非一端鈎奇弔詭多用權
遙望古人已不朽附之者傳攻亦傳郭象註莊固同久
劉幾糾史亦僉懸桑生用意蓋在是乃詭不欲厄兩賢
後來文苑爲立傳竟因斯語特著篇此正文人狡獪處
被我說破不值錢

懷遠縣雞翼灘

我行粵西灘河亦已多最險努灘與伏波伏波灘長三
十里滿江怪石紛相摩努灘雖短石橫列攔江排連截
怒渦殺機在途勇夫駭過者一夕頭欲俯然其行舟之

處尙寬闊可避中溜從旁過竭來懷遠城逆流遡牂牁
大艣行不得換取舴艤輕於梭謂當駛若鳬鷺誰知
雞翼大灘更惡劣建瓴雪浪高差我急如萬鈞之弩發
勁羽曲如九層之殼旋交螺路旣迂迴復偏窄一綫河
身兩邊石東張齒牙西礪角間不容髮只一隙孤舟入
此鼠穴鬪要與水石爭咫尺前衝洶湧百沸湯旁避槎
枒萬枝戟掀簸如箕薄如紙魂魄動搖心膽裂長年力
盡叫欲死一條竹篙刺水碧移時出險神少安回視妻
孥尙餘嚇噫嘻乎天下乃有如此險人生乃有如此阨
不知瞿塘灩澦更何如若論伏努兩灘已衽席我聞此
路昔未通唐蒙兵後仍雲封猿猱下飲搖撞汲不與人

世同華風自從古州平苗後

雍正年間事

始比蜀道開蠶叢今

來過此堪想像河不成河江非江

川

其初應本是山麓

地勢稍下爲水衝年深泥沙盡刷去獨存石骨梗浪中
安得五丁椎鑿利征客轉思楊焉鐫削非愚公獨慚書
生功業能多少偏狎風波催髣老豈有王尊叱馭才也
誇九折卬袞道

牂江道中

遷地敢三宿戀沂流憑百丈牽南來無落葉樹西去皆
上水船

峽東天容寂寥波流月影零亂夢同何處香清叢桂風
生夜半

虎或當畫出山牛能截江渡水遠沙鷺似白人重霧樹如黑鬼

密箐烟迷窈冥陰崖風刮淒凜深篁忽有人出驚是獼猴下飲

水碓岸根石出嵌空瘦骨脫膚當年朱劬若見也載綱船入都

入雲磴百盤計人行如旋磨蟻俯江樹千尺餘猿掛似貫柳魚

山高見日常遲日沒又偏覺早可憐深谷人家長是夜多晝少

深樹惟聞鷓鴣滿山相應猿猱逢墟多買薪蔬前路恐

無郵落

苗樓

苗人結寨必有樓樓身高出寨上頭每逢公事須集衆
樓中擊鼓齊會謀仕雞血漉盆酒飲如衆侯國盟葵邱
樓高五級或七級中央透漏四角周愚苗不知奉佛法
未可擬作浮圖浮我從粵西入黔境遙聞樓鼓喧高秋
乃是催夫聚水驛爲我牽纜送我舟斯須諸苗盡來到
綠荷包飯自裹餽銀環墜耳徑寸大花布束髻一尺修
一纜十苗走何駛但聽船底濤聲颼每當灘高水急處
矯捷不減獼猴猴跣足輒騰絕壁上躡身或入水或出
相傳苗性頗狠驚不意如此馴且柔何哉往年下江蠻

苦刀幾砍兵兜鍪微聞事由胥吏激鋌而走險不肯投
乃知此輩實椎魯心無六鑿惟天游順則供使如犬鹿
拂則反觸如羊牛寄語苗疆各長吏幸與弭帖勿與讐
畱此樓作干城衛毋令擊鼓興戈矛

古州諸葛營

我昔從軍走滇徼所至俱有武侯迹瀾滄西去到木邦
遺壘爭傳承相壁

永昌後木邦
俱有諸葛營

今來入黔首古州又有營名

表公額夷攷當年用兵地木鹿都魯極西磧距此奚啻
六千里中有千山萬山隔五月渡瀘七月平統計出師
日纔百兵縱神速倍道馳亦豈能來樹營柵想是擒縱
威聲在一時羣蠻盡辟易地中鼓角皆雷霆山頭草木

總戈戰遂疑處處有公到如水行地初不擇英雄作事
以氣勝力所未至光已射一方戰定各部讐數月功成
亘古赫經過我亦一儒生懷古真慚軀七尺

十月朔日抵貴陽聞官兵自滇入蜀路經威寧余
未及受代卽赴寧料理過兵途次雜咏

天許遊蹤徧八荒一年輒易一殊方滇雲粵嶠都行遍
又記郵籤到夜郎

出守鎮安未一年赴滇從軍在滇年餘回鎮安甫九月調廣州在廣一年今又入黔每一年輒易一地也

纔卸征鞍貴筑城正逢驛送入川兵赴官并不攜琴鶴
只駕單車叱犢行

羅甸羅施鬼國貧

貴東爲羅施鬼國貴西爲羅甸鬼國卽古鬼方也

當初都是處流人誰

知今日蕃昌象勝酒蘆筍別樣春

三石茅棚嵌碧螺坡邊蕎麥水邊禾萬山深處都耕徧
始覺承平日已多

風緊霜乾脫葉翩空林如洗少棲烟客途久不逢搖落

重感婆娑枯樹篇

兩旁及滇南樹皆不落葉
黔西則入冬悉枯樹矣

白氍纒身猓而黥來迎刺史過山蹊依人不分馴如犬
此是安家古水西

洪爐煉汞出鉛華斛土論錢帶雨耙怪底山童無樹木
五金殺氣在泥沙

蓮華殿諸山出
鉛礦無樹木

由來高處最寒多官舍層椒似鳥窠

貴西署
在山頂

冰雪滿空居

絕頂教人呼作鐵頭陀

七星橋題武侯祠相傳昔南征過兵處

飛橋近接武侯祠傳是征蠻此過師山似星文排北斗
關憑天險控南維勲名一代恩威用形勝千秋戰守資
曾到滇南覽遺跡君才十倍繫人思

謁故將軍阿公時亦自滇入蜀從勦金川

一肩曾荷擔千鈞官罷仍資掃賊氛邊事又添新戰壘
威名終屬故將軍洗兵雨淨三巴水揮扇風馳八陣雲
看取功成還絳闕轉圜

天意重酬勲

述庵璞函亦從軍入川余至威寧得一握手燭未

跋卽別去璞函有詩見寄依韻奉答

兼程到及夜分遲又是征人入蜀期作賦豈尋巫峽女

從軍猶逐羽林兒，傾囊不暇翻詩卷。
剪燭先催酌酒卮，三載離懷半更話。
那禁執手淚如絲。

家在吳淞徑，就荒遙憐清夢繞江鄉。
失官遷客將還職，君以游勢已衰雅引見殺賊書生豈擅塲。
羅鬼瘴添胸塊，悶蓬婆雪耀髭。
絲光臨分但祝加餐飯，不爲千金陸賈裝。

幕府羣推借箸優也，須熟慮發奇猷。
狂生曾唱公無渡，謂前歲議安鴻渡江事勁旅終資將在謀。
叩竹杖輕行作伴，鄒筒酒美醉堪候。
兼將井絡天彭勝，增咏新詩入選樓。

用璞函韻寄述庵兼柬松茂觀察查儉堂

故人得見未嫌遲，萬里相違本不期。
官罷杜陵猶作客，才高文舉直呼兒。
來經鐵索滇橋路，去酌鄒筒蜀酒卮。

玉帳術中需贊畫喜君猶未髻成絲

膈膊霜雞午夜荒燈前一握又他鄉那堪好友頻岐路
不分書生老戰場國險魚鳧稀日影陣懸蛇鳥入秋光
期君早上平戎策旦晚還朝卸客裝

遙識西行禮遇優榕巢刺史擅新猷論文應有聯牀語
料敵全非築室謀貴客傾人叩邑令新詩懷古武鄉侯
送君轉憶長安舊曾共消寒雪滿樓

官齋

形勝西南控制遙孤城百雉倚山椒一條路縉滇黔蜀
諸種人分猓犵苗納土久看遵約束急公爭自赴征徭
下車撫字應先務未暇威行吏六條

江月冥冥雨線懸始知吹日未虛傳地連西蜀淋鈴棧
景是南宮潑墨天雞羽當花翹插髻羊皮帶血冷披肩
殊方風物真堪笑惜少新詩細碎編

續調黔兵赴川余至畢節料理過境

手催勁旅赴西川點驛簽夫夜不眠莫訝書生鞍馬熟
從我曾踏萬山巔

穴中鼠子敢縱橫佇看軍功掃籜成傳語健兒須努力
至尊曾贊貴州兵

征緬之役惟黔兵
耐苦上深嘉獎

千里山程入蜀高送他隊隊過旌旄歸來候館殘燈下
重看正南舊佩刀

威寧途次遇凌

山氣蒼物成冰土人謂
之凌查初白詩作另非

槎枒老樹映晶瑩王蕊琪花夜不眠戲傍馬邊連凍攔
折枝聲碎玉泠泠

山高直在太清端嵐氣朝凝作凌乾萬樹冰花似梅蕾
道人消受此清寒

凌

侵曉望寒空瑤華滿遙甸傳是下凌天奇景驚翬見初
疑霜色皚旋訝雪光眩霜應碎如粉雪亦飄爲片茲獨
若霧凇稀微當空濺粗豈同霰珠纖不及雨線方其濛
濛下曾弗濕衣緣著物乃作冰其白忽如練是知卽嵐
氣爲寒所凝鍊霏時色似無觸處光始現遂令彈指間
晃朗素彩徧山河水晶界屋宇琉璃殿枯枝銀粟垂老

樹瓊花綯一笑威寧州鉛華產本擅

州華白鉛
歲八百萬

胡爲不愛

寶盡出鋪地面妄語聊解頤清聊足流眄居非雪窖窮
識豈木介變繁余老儒生瘦骨故寒健曾踏塞上冰喉
卷朔風曠年來宦炎荒漸與溫煖便驟焉入嚴冷那禁
齒牙戰所喜景奇絕幽賞在庭院淡素稱官清寥蕭宜
歲晏因之記節物紙窗炙凍硯

閱邸抄喜述庵璞函復官却寄

十年朋好劇關心喜見除書復舊簪磨盾共知臣力瘁
賜環真荷

主恩深官從歷井捫參得詩向黎風雅雨吟不失朝衫
添篋草殊適應倍感難任

送王協和總戎進勦金川

勃律天遙久勒功

平定回部
澤在行間

又提勁旅勦番戎
威名共仰

關西將韜畧曾傳圮上公
川隔蜻蜓憑絳度
路過箭箐有門通
佇看轉戰平羗速
歸及山桃二月紅

喬松落落見長身
髯也英雄果絕倫
拔戟自當軍一隊

橫矛能退敵千人
勲名到日成功速
文武同年別誼真

君鄉榜與
余同庚午

君至邛關相憶處
捷音好屢寄郵塵

水西道中

曙色催人馬首東
荒雞不住叫霜空
雪殘枯樹尙餘白
日出亂山相映紅
親老宦程宜早退
官高民隱益難通
巡春露輞慚何補
虛擁騶前畫戟雄

臨同年孫補山學使話舊

故人重見髩添皤
追話兵塵感慨多
絕徼秋聲諸葛鼓
戰場夕照魯陽戈
衝車力盡猶攻壘
擊楫心雄竟渡河
同是征南戎幕客
那禁思舊淚滂沱
余與補山同在經畧幕下
補山則隨渡憂鴻者也
堂前初見捧盤匱
得就西階樂可知
君方娶見婦
却憶少年登第日
也成新婦作婆時
光陰過客雙丸速
婚嫁牽人五嶽遲
剪韭寒窗話疇昔
一尊同感髩如絲

壬辰元夕蔡松霞廉使招同冀醇齋觀察讌集酒
後又出街看燈

清商小部侑賓筵
正是良宵璧月圓
老去共貪竿木戲
少時我本柘枝顛
分杯數恰符三雅
下箸餐應費萬錢

自是使君多逸興要添佳話入新年

綵棚簫鼓晚來多似逐籃輿緩緩過萬里夜郎寧覺遠
滿城春女亦能歌魚龍曼衍成銀海星斗闌干徹絳河
簿領餘閒須作達莫嗤市也共婆娑

種竹詩爲崧霞作

隰地新鋤一稜雲栽來翠篠翬清芬知公不肯言無肉
故託高懷對此君

老病維摩結淨因空牀只想竹夫人

君方喪偶

却憐湘女纔嬌

小未可橫陳伴久仙

月落空庭送影來新梢萬尺過池隈
鶯溪素綢吾能畫
莫笑交同要襪材

萊公手植爲投荒君亦何因托興長看取他年清蔭滿
始知苦竹是甘棠

偕補山崧霞遊雪崖洞甲秀樓諸勝

人生衣不過帛一束食不能粟一斗何苦出亦愁入亦
愁身比鼠穴銜簍簌不如逢場且作戲得錢便沽酒今
朝風日佳發興自良友提刑司清柳杜衡文堂掃粃垢
相邀出城遊屏却騶從吼或疑陌上逢三叟或疑中散
出街走俄到雪崖洞石竅嵌空誰所剖穹窿笠覆翳透
漏孔穿藕鐮鐮古佛好身手迦葉應真相左右斜通一
罅開竈窳癭而入坎似納牖生平傲不肯折腰屈使由
竇也俯首獨思單椒秀澤徧天下何限玲瓏洞壑仙霧

守茲崖奚啻一培塿特以近都會名轉噪人口足悟遇
合偶不偶一笑下山去門前水清瀏暑月應有紅芙蓉
春風猶未綠楊柳沿溪隄度林藪又見危樓高巋然霧
光壽其旁長橋如飲虹其下淺水不沒狗傑搆突兀中
流中欄楯詰曲百尺隄聖者白漆者黝金碧莊嚴勢雄
厚巖荒本無秀可甲不得不推此巨拇前有鐵柱丈八
九紀平甫功筆如帚可憐幕府開疆印懸肘至今祁連
冢中骨已朽何況壁間題名人波磔橫斜類蝌蚪妄冀
翰墨垂永久噫嘻乎浮生若夢區區榮名亦何有事功
莫移愚公山著述姑付楊子說君看壺頭鼓噪病足曳
囊中錦繡苦心嘔窮老盡氣煩惱徒自取豈若朝彈絲

暮擊缶看雲杖藜賞雨剪韭縱浪大化間清福且消受
山僧頗解事邀我香積具瀦修盧仝七碗餘淳于二參
後耳熱歌呼到日酉歸來滿城燈火猶熒煌上元後三日灞陵
醉尉不敢呵誰某真成樂上樂脫盡官場俗窠曰試問
狔烏蠻花天千年以來曾有此舉否明朝狂名應傳遍
準備甘蔗入彈糾

聞故將軍阿公授四川提督却寄

故侯威望肅霜寒

恩命重聞錫帶鞶至竟登壇須大將莫嫌專閫尙粗官
馬蹄裹鐵盤危磴牛車縫船渡急湍計日掃犁馳露布
更看勲爵冠朝端

征南幕府半凋零

經署傳公將軍果授阿公皆下世

碩果天畱一將星

戰

勲名身未老五丁開鑿路重經

前次平金川時公會戎幕

功成飲馬仇

池穴事定磨崖劍閣銘蜀徼黔疆鄰近在捷音早晚得

先聽

于役古州途次雜咏

曉赴龍場驛路遙試燈風裏雪微飄蠻荒瘴旅當時事

二百年來瘴已消

生長江南苦少山每逢巖岫愛躋攀年來踏盡千峯險

又想平疇一片閒

插髻雞毛當翠翹短裙及膝襖齊腰天南風物無堪記

來賦睢蛙九股苗

夜持炬火入空嵌月黑途危勒馬銜驚起蟄雷眠不得

亂掀風雨洒征衫

貴定道中夜行大雨雨

依山高下闢畦町膝稜層層帶草青最喜梯田名字好

方言吾欲補圖經

山田隨坡地高下自成等級土人謂之梯田按范成大驂鸞錄袁州仰山嶺阪之間皆田層層而上名梯田則

宋時已有此名也

忽行深坎忽層巔俯似懸空仰似眠笑比鴻都楊道士

上窮碧落下黃泉

邪許聲中著力咸諸苗組我上巉巖笑看南俗轎牽纜

好對北方車挂帆

曩在山左途次見輓小車者順風則張布帆今來南中肩輿上山必用人夫牽纜可作一對也

石磴摩雲往復還青山隨我馬蹄間一鞭徑過山應笑

這個官人不愛山

都勻道中卽景

灌木成邨棘作籬
兩三茅舍倚巉支
汲流但截修篁節
葢屋全編老樹皮
架木橋欹驢不進
伐薪人出犬相隨
分明一幅山家畫
可惜荆關未得知

苗人

侏僂言不辨
椎魯意偏真
混沌猶無竅
榛狂畧似人
千針縫衲細
百褶製裙新
莫笑鬼方陋
淳如懷葛民

過三腳屯上牛皮嶺

牛皮大嶺入雲蒼
浩浩天風洒面涼
一水繞山隨曲折
千峯與我互低昂
危途身試橫竿險
老態人嫌舞袖長
埃館尙遙天欲暮
笑同夸父逐斜陽

都江道中

右臨峭壁高差峩左瞰奔湍浩掀簸一綫路入青冥端
今日須從此中過可憐昂藏七尺軀命托輿夫兩肩馱
幫以絳夫挽雙纜百足彎環淖泥瀉直向懸崖坎而登
趾高於頂幾倒臥忽從削成又直下建瓴勢更易跌蹉
危深寸寸螻循條憊甚團團蟻旋磨輿夫絳夫共一喘
脈憤氣竭口無唾行不得止少坐呼來苗船小如葉暫
借沂流息勞揮復遇頭難二難三難灘三灘名石骨峩峩浪
頭大但聞洶湧濤聲厯不聞邪許人聲和千枝箭鏃迎
面射百道劍鏑向底剉轟來身似碓屢舂撞處心比舟
先破到此又覺登陸好茫無可憑其將奈噫吁噫乾坤

蕩蕩本空闊，突設奇險誰所作。
山行欲鬪猿猱攀，水行愁餒蛟鼉餓。
我行萬里半天下，如此畏途無幾箇。
夜半來投旅館燈，出險聊持一杯賀。

崧霞於署園分二十四景，各系詩，出以索和，戲爲長歌答之。

崧霞使君大好事，遷官不喜喜得地。
解舍有園兼有池，竹石亭館約畧備。
輒爲區別諸品目，從頭一一安名字。
不夜之臺不漏天，閨中亭館名非指喻指妙，取譬其餘卽境悉。

揣稱百五雅材工，位置景各系詩。
詩六言錄成副墨，特誇示我昨蠟展來經過周。
遭不過十畝計，旣非洞天六六藏。
但有蒿徑三三翳，安得一重又一掩。
漫誇八到復

四至得非堂均當海觀井乃封垤作山企試較石家梓
澤園李家平泉花木記奚啻蚊睫蟪蛄巢寧足分題詡
清閼使君輾然忽失笑拘墟不可語於智達觀豈論境
寬窄一滴堪識海水味陶輪搏入華嚴界芥孔納得須
彌翠矧茲林樞雖不多亦自曲折引深邃澄波滑笏紋
洄沄密樹張幃影虧蔽虛室生白涵夕暉高齋來青爽
朝氣公餘偶此寓清賞弄月嘲風恣游戲豕亥字讎
書籤鼠尾丁頤評畫筭巡簷索笑得少佳顧影獨酌亦
成醉此卽老人安樂窩何妨縷析標勝致俗殺人間杜
韋曲鶯花繁艷土木麗客聞此言大有理名旨直挾南
華秘非魚我不知魚樂看花君獨得花意遂令衙齋地

百弓頓起滄江千里思
井西道人寫不盡溪南老子吟
可寄我將支筇日來遊探幽探徧二十四爲語主人勿
拒客要破貧官酒錢費

崧霞署園牡丹盛開連日招飲賦謝

春色無煩羯鼓催使君官閣牡丹開明朝要請看花客
預洗雙觚藥玉杯

名花性愛主人賢頭白園丁記憶專自種此花三十載
不曾繁艷似今年

黔土常愁厭雨長已張繡幕護名香天公也似憐人意
連日春晴作艷陽

好花從古比傾城何許穠華照眼明特與扶頭澆美酒

老鰥母乃尙多情

露華濃壓畫欄東碧落高高夜不風高下明燈三百盞
要儂更看晚妝紅

朝朝掃徑累闌官衙鼓纔收便倚闌定合被他喚惡客
未開直看到將殘

甌北集卷十九

起壬辰三月至是年十月

陽湖 趙翼 雲崧

古州

古州吾昨到黔陽一通津騶騎重來路
鶯花欲暮春兵猶留重鎮苗漸似齊民
四十年開闢君看化理淳

黎平王太守招同翼郡丞李明府讌集五榕山卽事

投轄深叨雅意留賓筵高占碧山幽
鳴騶太守開公讌打鵝參軍進主謳
時適離劇嘉蔭五株垂十畝清江一曲瀕
雙流醉歸燈火西湖似何意蠻荒得此遊

贈龔梧生郡丞

茗生老友貽我詩有爲龔侯題幀句

去歲將心餘寄近作一本中有題龔侯所藏技指生

墨迹即君物也

吾不知侯何如人意必妍雅擅高趣豈期相見黔

陽天問里况共江南路乍晤已驚骨格清深談彌識腹
笥裕官無長物俸分鶴家有古書身作蠹稱詩評畫一
一精下語輒比郭象註使我不覺恨見晚醉後心期盡
披露胡爲我來君將去跡似參商避朝暮七千里外百
蠻中如此勝友寧易遇秋風落葉洞庭波春柳長條白
門樹知君卜築近秦淮茗生亦在彼中佳預擬他年互
來往三老風流桃葉渡

谷岡道中

陸行日日遇巖阿此地尤稱錦繡窠嶺樹身長枝葉少

溪流性急浪濤多野禽五色仙裙蝶山黛千盤佛髻螺
可惜輕拋蠻徼內幾人來此寄清哦

南籠

殘明僞永明王自粵西
竄此倚賊孫可望爲援

當日亡王此駐師孫思遙應作籬籬投荒緩死謀何濟

倚賊圖存事可知君后支糧須計日

可望使僞守給糧冊書
皇帝一名妃嬪幾口

公

卿召甲總橫屍

可望遣人來索通李定國
者殺吳貞毓以下十八人

可憐斗大孤城裏曾

習朝班拜舞儀

馬場

即吳貞毓等墓葬處僞永明
王親題十八先生成仁處

一邱枯骨掩輪囷斷碣曾題詔墨新事去太阿歸劇賊
亂來葦席裹勞臣衰朝黨禍黃門獄此輩清流白馬津
見說瀟瀟風雨夜居人時聽泣青燐

海龍岡

播州楊應龍自焚處四面陡絕上有平地可屯數千人兼有井汲之不竭異天險也

四圍嶄絕陡無門上有寬平可駐軍扼險欲過唐夾寨
攻堅幾費李摩雲國餘暮氣兵猶勁地欲華風賊自焚
平播後卽改流今遵義府也五百年來淪異域一朝摧廓亦奇勲

鳴池河

鳴池兩岸陡如門千仞懸崖斧劈痕絕似巨靈高掌力
分開太華放河奔

危途如線入屏顏側嶺橫峯紫翠斑斕碎石紋嵌短草
皴成一幅廣西山

路經黔西戴春臺州牧邀遊東山寺卽事

曲徑通幽喜乍經風塵中有此禪房兩山臂抱三重屋

十楣肩排一字屏蠻國當年誰所植僧寮此日客堪停
山名雅稱人高卧慚愧吾猶出戴星

野性惟貪景色幽每逢佳處愛停騶壺觴竟踐看山約

在貴陽時
君先有約

猿鶴偏嘲喝道遊地主開筵當軟脚使君出郭

作遨頭壁間名句殊難和

壁間有孫補山學使及
州牧蘇君去疾題句

小憩聊爲訪

戴留

抵畢節攝威寧牧崇君士錦置酒梓潼閣邀同總
戎福公興觀察龔公都閩蔣君成章畢節令邱
君堂讌集卽事

邂逅朋簪集留圻地主嘉行廚攜蜀酒小閣對蠻花詞
豈黃絹籠應有書妙清游聊紀勝林影夕陽斜

明史

戟朱幡豈易膺坦途應更履如冰誰知到漑身猶臭
作宣明面可憎使酒不聞三爵退擁車自喜八騶騰
失看慣秋千架纔上高層又下層

鞭學士段文操刮目多承賞鑒高抵鵠不聞輕用玉
雞也要辨何刀詞頭天上宣麻貴盾鼻軍中草檄豪
日江郎一髮危老瞽去吹毛

關索插槍巖歌

萬仞危崖拔地起磴道盤空有遺壘土人相呼關索巖
云是漢前將軍子曾從諸葛征南來丈八鐵槍插於此
我讀蜀志典可徵翁二子平與興此外不聞更誰某

母乃荒誕未足憑然而滇黔萬里境到處俱有索名嶺
若果子虛無是公安得威聲至今永當年壯繆心安劉
胸中浩氣橫九州一門忠孝出天性厥子亦定賢豪流
渡瀘深入不毛地將種應爲丞相倚斷頭掉尾紛猥苗
蠱毒蛇氛叢瘴癘想見前驅摧陷力生闢鬼鄉作人世
嵯峨翠壁高摩天一槍留鎮何機權豈同射石箭沒羽
或比刺山劍出泉要以神奇警蠻俗如鐵柱殺蛟龍涎
君不見武鄉擒縱用心苦亦假威靈靖南土深崖往往
貯金甲貴陽有諸葛藏甲處荒村處處瘞銅鼓蠻村多銅鼓皆云諸葛鼓也不知此物
究何用千載羣蠻舌猶吐可知一枝綠沉槍直抵長坂
蛇矛萬人阻我來跋馬蒼山根陰風颯颯寒荆榛欲求

故蹟已罕有偏覺英采垂千春年深世遠不消蝕此豈
得謂無其人嗚呼書生論古勿泥古未必傳聞皆偽史
策真

題署中桃樹

意外夭桃漸滿園去時曾訂賞芳菲花當好看無人看
春已先歸始我歸却省傷懷紅雨落翻欣結子綠陰肥
可知凡事都如此每到當前願輒違

借福總戎湧珠亭讌集

亭在威寧城北山下有池泉從池底噴出大如葡萄俗又名葡萄泉

借得林亭宴客來羊城曾記日追陪豈期好友還重聚

余守廣州時君爲督標副將晨夕相見余至威寧君又擢南籠總戎來攝威寧軍事

况值繁花正艷開地出醴

泉應作記人逢舊雨要銜杯湧珠亭畔添佳話騶騎清

遊盡日廻

爲胡守閫題其尊人衛卿遺照

鬚眉看老輩耆舊似襄陽訓子柳公綽居鄉王彥方名
著丹漆管門列綠沉槍蘭綺應逾拓綠知世德長

卽景

慚愧取前尙入騶略無可稱捧錢優半間屋小聊名舫
六月山濺早着裘才思漸如強弩末歸心已折大刀頭
閒來細數經年事何一堪爲惠績留

忽忽新霜上髻絲少年一瞥渺難追厭聽俗吏趨時術
漸喜名流晚歲詩牘判兩燈猶眩目餐加一醬輒傷脾
蘭單自笑疲牛力那更能爭駿足馳

猓羅

昨從海船詢番俗白者爲主黑者奴

西羊人白者貴種黑者皆奴隸

水西猓

羅則反是貴黑賤白等級殊四十八支濟火後自號黑種雄邊隅其餘白者悉下姓弭首帖尾供馮驅由來黔天本墨穴其色尙黝俗所趨却笑書生拘墟眼偏閱異類形睢盱試爲僂指述所見欲過立本王會圖初向粵西識猓獠槃瓠遺裔稱精夫他散處者滿溪峒狉狉狴狴狼狙惟傳馬流是漢戶伏波使守銅柱樞逾年從軍走滇徼熨夷波龍紛滿途姑刺得楞皆緬屬往往執訊軍前俘翻身能變飢噬虎有尾或似沘濟狐量移東粵稱腹地蜚人蜚戶仍根株五指山黎花挑面八百粟

妖板覆顱外洋客到狀尤怪或紅毛髮碧眼驢今來黔
中更詭異九股六額繁有徒牯羊鬪屍聚羣醜屹狔打
牙嫁彼姝裸人特其一種耳亦復魑曷殊形模通計南
陔萬餘里族類何止千百呼大都人形物其性混沌未
鑿猶頑愚矯捷登山脚不韞風流跳月唇吹蘆衣冠不
與人世接習俗未可禮法拘始知清淑氣有限中土以
外界弗踰就中馴驚雖不一嗜利好鬪性則俱剝牛磔
犬傳木刻時或突起操戈受我無相如喻蜀檄又無終
軍棄關繻所至乃與此輩狎如課七月兒之無得非風
氣欲開闢天以易俗煩腐儒腐儒安有經濟具徒恃忠
信豚魚孚入世難保不緇涅化俗愧無近赤朱不如還

他本色好黥烏浴鵠母乃迂

讀書

燭燭餘光漸可知一編聊與伴幽期
短檠忍便拋墻角修綆終慚汲
非眉掩卷卽忘神已耗讀書有益
老徒悲
古人輩輩成行列我向誰邊去立錐

哈敬齋總戎自滇入蜀進勦金川路過威寧話舊
太乙旗開井絡春手提虎旅上峨岷
十年戎馬無遺策一代封疆有數人
石堡漫憑堅似鐵礪門行見碎爲塵
璽書豈是輕移鎮蕩洗兵氛要重臣

回首滇雲絕塞長建牙威望舊遐荒
將門世佩三邊印蠻徼身經百戰場
孟獲曾來申誓乞吐番未敢劫盟強

老竹屯之役編入乞和公以單騎蒞其軍

天南歷歷成勞在驗取秋風雨髣蒼

曾共論兵幕府秋何期重此話軍邾英雄未老難辭擔
戰伐頻經益善謀九折危途驅竿馬七擒餘力縛羌酋
虎頭食肉平生志萬里終看定遠侯

水城

百里蠶叢盡孤城帶碧川地偏無古蹟山豁見平田莊
叟無何境仇池小有天如何此佳處拋落獫人邊

出巡媽姑福集二鉛廠

歲運白鉛八百餘萬供鼓鑄新改貴西巡道專司

物產稱連璞功參九府園地真不愛寶政固有官山賈
比銀差賤光如錫稍黥並隨三品貢終亞五金班礦亦
披沙揀爐凝煉石殷炒丹供續畫化粉上容顏未許爲

刀用能陪握槩閒參同方取汞鼓鑄價論銀舊紀生青
岱新看出白蠻官來寶賧裏職隸貨泉間石炭燒紅燄
礪砂剗碧孱椎埋紛惡少淵數集諸姦地大勾稽審途
長轉運艱輓輸招竿馬負背羅花鬘期慈頭綱悞程催
足蘭癥猶傳金穴富共覲枕囊慳風自盈雙袖功寧鍊
九還稍欣諸客戶安堵已成闕

懷心餘

散髮江湖理釣絲高雲舒卷見風期三千載牘才還在
四十懸車跡太奇閉戶著書黃絹字閒居奉母白華詩
故人萬里遙相望漢上題襟定幾時

再遊葡萄泉作

噴碧泉成串疑通海眼生我慚臨水照他是在山清未
可龍珠挂偏宜馬乳名挑來試新釀會及臘醅傾

先輩查初白詩云亂山中有豺狼穴曲突何人議

水西蓋其時雖已擒安坤改郡縣而獯鬼猶懷

反側也余所轄大定黔西平遠威寧卽水西地

百年以來皆成編戶矣經臨途次雜紀以詩

濟火曾標蜀漢功

相傳羅鬼之始有濟火者從諸葛武侯征蠻立功世有其地

千年兵號水西

雄斷頭掉尾諸羅鬼今日都編保甲中

匹馬朝天跡已陳開通九驛亦勞臣遂延三百年宣慰

何物奢香一婦人

萬古烏蠻窟穴高改流寧易偃弓刀犬牙相錯安州郡

想見當時布置勞

華風濡染變狂獠光氣將開色色新四十八支頭目衆
近來漸有讀書人

刀耕別自有田功不藉秋成穠穠豐白是苦莖紅是稗
滿山著色畫屏風

芳草茸茸路一條綠痕斜似女裙腰午風麝過餘香在
疑有蠻娘去未遙

韋約軒按察招飲卽事

使節臨滇僅隔旬旋移露輶慰黔民一科愧我稱前輩
萬里逢君是故人法律端資儒者用冰霜不改冷官貧
最欣剪韭西廳話還似京華雅集晨

荷齋十畝碧連漪亞字欄邊柳影垂無事好看鷗鷺浴

有人恨奪鳳凰池

崧霞從此遷齋荷齋轉不及也

文章舊本推黃絹簿領

閒堪表素絲勝地自應名士占可容老友數趨隨

白雲山羅永菴相傳爲明惠帝遜跡之所

白雲山上羅永菴傳有明帝棲遜龕考之前史帝崩火
安得遺跡留西南釋官雖傳老佛返議者輒謂無稽談
我思金川事倉猝母后未返宮已燁當時死生究誰識
鬼門何必無逃驂出屍七日葬以禮特掩耳目欺愚熬
既命胡濙訪邈邈復遣鄭監踰瓊儋長陵亦疑帝尙在
何況天下思遺簪所以從亡致身錄多摭軼事勒秘函
東湖樵夫補鍋匠荒天野哭辭詆謫亡國非以無道失

此意千載同悲含人心未死卽帝在焉知不雍爲瞿曇
皇覺寺中舊衣鉢一脈正宜冢嗣擔革除距今四百載
茲菴不朽猶精藍想見師徒卓錫到曾攜紅篋度牒三
新蒲綠時感懷切菜根青處歌聲酣獨嫌附會轉失實
洞號流米泉湧甘

菴後有流米洞相傳有米流出供帝爨前有跪井
云山高無水帝至忽湧泉出取水者必跪汲乃得

興

王或有百靈護泥馬著鞭蛇斬鐔遜荒久已時命去空
山魑魅寧朝參當是遺民切哀慕故神其說資窮探我

來弔古白日暮羣鳥聲正啼烟嵐

相傳帝題菴中詩
惟有羣鳥早晚朝

渡鴨池河西上大坡

扁舟紆度峽門濤廿里危坡直上勞孤月近人堪手攜
四山與我等身高下方無地川如帶絕頂何源水滿槽

信有人間天設險當年曾是水西巢

途中雜詩

梯田高下滿坡坵都有新泉浸綠禾最喜道旁聽好語
秋成今歲十分多

一線斜坡上碧穹真看去地幾千弓誰知到頂纔爲地
雞犬桑麻在半空

說與人間定笑休黔西三伏冷於秋使君不是談天衍
親著深山六月裘

路入蒼深日色稀陰森空翠滴征衣遙山片片散花白
疑是朝來薄雪霏

夕陽晴映數峯間樹石都成紫綠斑疲馬漸遲鞭不進

錯疑他也愛看山

日暮途長趣夜行誰言官不累民生郵亭松炬沿途送
絕似東華聚火城

落折河

亂山迴複中奔流一條水東西兩崖屹相距不半里若
從橫空過可以一箭駛却因凹復凸卯起行到已盤旋
下雲端屈曲出井底帶緩俯仰腰展換前後齒遂令尋
丈內疲盡千夫趾水濱興木末一幅杜子美尙可對面
呼已難接踵履乃知邊地大浪得虛名耳都在高下間
程籤增倍蕤試與量廣輪折尺不抵咫設險天何爲逐
喝我未止安得駕長虹徑度平如砥

夜宿平山哨

行盡千峯路未窮晚投堠館一燈紅
秋生風露寒諸峯人共星河在半空
夢可還家防易醒詩能送老苦難工
聽他童僕垂頭睡獨對寥天月似弓

平山塘頂處處皆水

既無高處源又非夜來雨云何絕頂上
滿地水如乳小者蹄涔涵大者箕槽吐
注供稻畦浸沒聽茅簷取乃知無高下
水常附於土是凡有土處卽爲水所聚
譬諸人血肉貫輸互相輔最高莫如首
轉屬血之府若疑崇山巔其地必斥鹵
何以頭觸破血出亦縷縷

苦雨

經旬積雨暗林扃黯黯秋容畫亦曛天是漏天誰補石
路非棧路亦淋鈴歲收漸恐呼庚癸方法空傳寫丙丁
可惜山家好收麥寒枯已改舊時青

國笠民觀察過威後枉贈佳章次韻奉答

經猷羣仰濟時英烏撒城邊蓋暫傾星駕肯容三宿戀
冰銜敢附一條清冷然甚善將風到能者多勞叱馭行
早喜旌麾開瘴癘重陰頓爲轉秋晴

水西不到不知勞風景君今入彩毫亂石橫生山少肉
嘉禾不產地無毛陋邦欲附慚鄉小法曲難磨畏郢高
別後旅懷誰與豁祇應日飲釀葡萄

舍弟書來於舊居之北買地將營草堂喜歸計漸

可成作詩誌意

邱壑胸中久未酬喜聞小築俯明流徙仍不出鄉同井
歸免權牽岸一舟往事猶憐茅屋捲新居終仗俸錢謀
舍旁可尙留餘地畧要栽花作近游

哭嵒霞之訃

噩耗驚傳賦鵬微寢門遙哭淚填膺一官先後來行部
萬里西南正得朋共我春遊多唱咏看君暮景尙飛騰
那禁腹痛黔城路處處相隨履跡曾

于役匆匆一款扉榻前絮語兩依依豈知便作搏沙散
曾擬重聽屑玉霏異地倍添寥落感中年漸怕死喪威
還悲丹旄東歸速不及生芻弔總帷

奉賀福總戎姬人到署之喜

將軍威令肅如秋時向霜天試臂韞忽漫春生鈴閣滿
衣香人影太風流

虎帳深嚴夜漏遲攤書常到月斜時從今酒暖香清候

可要還來借一瓊

公常向
余借書

經年惜別走京塵相見翻應翠黛顰繡佛燈前頻認取
崔徽可似卷中人

雲母餐來意自雄酒杯浮白燭插紅莫嫌老將風情少
尙有如臯射雉弓

煖老從知燕玉良炎天未講辟寒方到來烏撒冰霜地
始覺溫柔是此鄉

卽事

古井波濤了不興，蕭齋長日坐懵騰。
俗無可避將書洗，老不能辭覺病增。
韓筆杜詩風世友，周妻何肉在家僧。
眼前除却鄉思外，何物能消覺觀澄。

再遊葡萄泉道士玉宣乞詩書以付之

愛煞泉亭地數弓，幽偏不落軟塵紅。
虛牕四面皆山色，絕似環滁媚醉翁。

雞弁駢羅羽客家，一枝橫間一枝斜。
畫師惜少滕昌祐，來寫欄前細碎花。

不向深山刷茯苓，綠陰門院晝長扃。
黃庭讀罷還何事，

松下閒翻相鶴經。

道上養一
鶴甚馴

緇衣修道衲參禪等是三生結淨緣到此又增身世感

海山堯率兩茫然

右爲僧寺左爲道院故云

碧雲觀

纖塵曾不到仙壇曲磴摩雲八九盤客到自嫌烟火氣
山高常接斗星寒井華曉碧僮澆藥爐餞宵紅鬼瞰丹
勝地緣慳纔一宿征塵明日又漫漫

卽景

不枉圖經號鬼方陰森終歲少晴光地難種秫無秧馬

咸寧三百里內無稻田

市有懸裘是火羊

地產羊其毛甚厚號火羊

瘠土人勞頭易白寒

山樹老葉先黃秋風秋雨冥濛裏聞聽兒童話故鄉

歐北集卷十九終

甌北集卷二十

起壬辰十月
至癸巳三月

陽湖 趙翼 耘松

壬辰冬仲以廣州讞獄舊事吏議左遷

溫旨送部引見

聖恩高厚蓋猶不忍廢棄而裴親年已七十有五書來
望子甚殷諭令早歸一慰倚閭望因呈乞開府
圖公給假旋里擬卽爲終養計途中無事感
恩述懷得詩十首

一重公案律條訛鑄秩非關吏議苛迂拙自慚更事少
聖明猶慮棄才多恰從順水乘歸櫂擬乞閒身著釣簑
不是敢辜

恩命重高堂衰髯已全皓

曾將烏鳥訴私情大吏堅留計未成

謂去歲在粵乞歸養事

今日適酬

將母願 清時敢尙去官名循陔已愧歸期晚

當宁方修孝治明補報

聖恩猶有日髯毛故未雪花生

忝竊朝班近廿年闔家飽暖荷生全卽今去奉高堂飯
猶仗慳留舊俸錢犢鼻褌堪當院曝豬肝餽免受人憐
絲毫何者非

恩賜歸亦還遊

浩蕩天

新官將到舊官涼又見兒童竹馬忙一輩袈裟先退院

滿堂袍笏遞登場刊碑政績胥徒演卧轍人情里老妝
莫便據爲儒吏迹妄希青史傳循良

多謝諸公苦挽行

圖公堅欲奏留補山約
軒堂民請公亦多敦勸

實無才可濟蒼生勤

將政補猶形拙清愛人知己近名坎坎伐檀歸客思依
依折柳故人情翻教不忍輕言別管酒更番爲治觥
衙齋無事可消磨一載閒情付咏歌老去賀公吳語慣
病來莊舄越吟多滄江秋晚衣裁荔空谷天寒屋補蘿
不覺詩成真作識篇篇都是憶巖阿

官罷

君恩忍遂忘尙餘秃管寫枯腸好編潁上歸田錄敢效
忠州集古方舊學還期傳黨塾新詩閒與咏羲皇生平

報國堪憑處終覺文章技稍長

數日纔經畢節城退閒何用急裝行八騶已少車前列

五馬猶煩道左迎按部聲名歸物論去官風味見人情

山楓知我無旌旆也染新紅綴驛程

安順守戴君遵義守于君俱在畢節送別

有客還求贈別篇似悲失庇泣離筵迂疎身豈中流柱

老鈍詩如上水船走索偃童行最險書紳瀧吏記須堅

他時風雨懷人夕應在蒼葭白露邊

過大定郡守李俊三九點依依索詩留別若素人亦

擬乞養歸里故云

頻歲思歸計尙懸及歸敢便傲林泉板輿潘岳閒居賦

茶竈天隨甫里船爲母寫經祈上壽隨人賽社報豐年

譜成華黍南陔什或入

熙朝二雅篇

畢節途次接璞函軍營來書兼寄滇中詩八卷內
有自朗州至貴陽諸作則皆余今日所必經地
也擬盡和之先此馳寄并東述庵

書來剛及罷官晨千里相關出處身拙政我慚留敗筆
孱軀君尙轉勞薪冰霜寒信催歸路書記才名老戰塵
太息江鄉無好友對牀風雨共誰親

黔山烟霧楚江波曾記勞人屐齒過殘雪已無鴻爪在
退風今傍鷁飛多將君來路爲歸路引我長歌又短歌
獨惜孤征少同調聯吟輸爾有羊何

西南萬里兩書生參佐滇兵又蜀兵踪跡漸歸流寓傳
詩篇多帶鼓鼙聲身爲客久悲金盡天要人傳費玉成

莫歎江關最蕭瑟一時徐庾共知名

將發貴陽開府圖公暨約軒笠民諸公張樂祖餞

卽席留別

離人將上洞庭舟餞別深叨喚主謳爲我紅塵留不住

開場先唱岳陽樓

演呂仙洞
庭故事

罷官敢復戀華珂何事臨分淚轉沱老子婆婆爲君等

生平此地故人多

當筵忽漫意悲涼依舊紅燈綠酒旁一曲琵琶哀調急

虎賁重感蔡中郎

傷蔡松霞之歿也
是日又演琵琶記

解唱陽關勸別筵吳趨樂府最堪憐一班子弟俱頭白

流落天涯賣戲錢

貴陽城中崑腔只
此一部皆年老矣

飛雲巖

浮踪訝入華嚴誤千朵妙鬘擁人步何年巖雲觸石出
復化爲石此焉駐無根裊裊凌虛空幻出寶珞龕一具
着色屏風非筆描都是膚寸八爐鑄肖形百物無不有
花鳥欣愉龍象怒名手道元不能畫巧匠劉鑾不能塑
搏控空誇活脫成刻劃猶恐痕迹露天公毋乃太狡獪
役使萬靈剛三素茲巖若得移江南宛委娜嬛敢相妬
紺宇琳官知幾重朱簾碧檻應無數羅綺佳人拾翠游
簪裾詞客登高賦惜哉拋落蠻荒中千古勝流誰一顧
神鞭曾聞石驅走靈鷲亦有峰飛度歸途我欲挾之行
携置姑蘿虎邱路

張三丰禮斗亭

在平越商其觀後有古桂一株大數抱

高真古觀鬱葱籠猶說仙翁斗檢封遺跡已無華表鶴
借名曾訪鼎湖龍

胡溪訪張邈通寶訪建文君也

山深時或飄丹粟人老惟

思伴赤松我已退閒期學道前途倘許一相逢

施秉縣

即偏橋舊爲偏沅巡撫所駐地

數家邑小雉樓崇舊設中丞幕府雄衝要尙供郵騎飯
承平久靖戍旗風石多山骨出皮外洞矮水頭鑽勝中

上游諸水至此由訥葛洞山過鎮遠江

劇喜陸程今日盡扁舟行泛碧波空

舟發灘陽

灘溪五溪源淺碧俯見底客行陸程盡水程自茲始小
舟昧陽來高僅尺有咫欠伸輒打頭趺坐不得起生平

負傲兀罰受折腰恥妻孥有怨言僮僕竊愁視倦客顧
弗聞但覺舟行駛步步是歸程程程是下水

溪河本非河其始蓋山麓爲水所衝蕩泥去石骨蠹石
多遂成灘節節駭機伏急流方奔騰一束起怒瀑狹或
尺二三高或丈五六可憐上灘者力盡一篙竹波吒命
欲拚邪許聲似哭苦恨天設險劫此扼隘酷嗟哉一何
愚不見睫者目危灘雖多阻迅水實藉蓄設無此隔閼
留水作洄湫將愁一瀉盡又歎舟行陸

上灘遲如牛下灘疾於鳥上灘恨灘多下灘恨灘少逆
風掣柁半順風駕帆嫺逆風恨風大順風恨風小人情
務貪得孰肯平心較試與下灘人回看灘水倒嗟彼上

難者求魚緣木杪試與順風人回看風力矯嗟彼阻風者待兔守株老凡事作此觀百念可以了

沅州道中

言入湖南路初開眼界空江山漸平遠城市乍繁雄芳

芷涵波碧丹砂透石紅

山石皆紅色或言近丹砂礦故也

黔天重回首烟霧

正冥濛

瀘溪道中沿江峭壁千仞其陡絕處多架木爲椽上下皆無路可入俗以爲仙人屋其說無稽徐季方見聞錄云舟行沅江見萬仞壁立猿猴不能到而懸崖之上有小舟一隻望之約丈許云云以爲奇幻及閱王新城尙書隴蜀餘聞及許

續曾漢行紀程乃知爲當時避兵者所居也查
初白集亦稱初入黔境土人皆居懸崖峭壁間
緣梯上下與猿猴無異又有詩云忽憶少年日
南走五溪窮百蠻蠻人寄命巖洞裏多構柴柵
臨崢嶸此亦一證璞面白沙灘詩中疑爲山鬼
之類似未爲得實爰用其韻紀之

臨江削千仞崖以險擅妙正從絕人跡壁立開洞竅胡
爲有樽櫨橫斜架其壘上下兩無路何處入崙窾憑空
安施繩離水難渡櫂或云仙人居意揣亦惟肖飄然仝
喬流乘雲戲壺嶠豈屑此危仄戛戛矜獨造我讀新城
編紀載殊得要時危值軍興搜掠徧荒徼候騎鬼卒邏

遊軍虎倂導民欲逃其生艱於藏琤珥復壁愁被窺窟
室恐遭屠計窮托茲險號咷以求笑幸與山魘鄰敢使
狙公掃尙慮壁飛人或來攀蘿薦至今剩遺跡一一可
憑弔世遠人不知翻作奇景眺我來考前聞感事吟哀
調日落荒山空嶺猿一聲叫

辰溪道中大雪

舟行連日好天氣今朝奇寒出不意發怒灘爭急浪雄
作威風挾凍雪厲篙師寒疾不得施叩頭乞泊河之湄
歸人一笑聽臧權不比赴官有限期

辰州弔諸桐嶼

腸斷辰陽放棹行故人曾此擁專城我來東道誰爲主

君在西清最有聲，傲骨竟成招謗具。高才未就必傳名，沅江水駛流如箭。何限人間歎逝情。

將至朗州作

溟黔天爲山所械，萬山圍在青天外。今朝眼界豁然開，出得山來天始大。經年坐守深山幽，豈知山乃盡朗州。萬山送我却私笑，此人去竟不回頭。獨嫌山盡水復吐，前途又狎稽天浪。洞庭湖濶漢江深，一葉扁舟兩枝槳。已徧天南萬里行，歸途翻更切心旌。山平水軟江南路，屈指還須一月程。

朗州除夕和馬沅亭秀才韻

除夕連更六異鄉，今朝遊跡又瀟湘。一官恰似殘年盡，

舉世猶爭此日忙老去敢辭杯最後春來漸喜線添長
素心閒與江干步早有寒梅破臘芳

洞庭阻風用查初白韻

逆風阻歸路急篙趙前程此身已爲退飛鳥忽復躁進
咫尺爭驚濤聲喧如急雨長年懇切來致語官今既是
歸去人勿與雲夢相吞吐詞雖含諷理則公足抵漕吏
書一通且向湖干守蕭索勢所難爲力須度曾此河神
小婢來而今真笑書生弱

題岳陽樓

水落湖光似鏡平倦遊人過岳陽城愧無憂樂關斯世
擬學神仙了此生壯氣漫吞雲夢澤微才敢附杜陵名

湘靈鼓瑟何心聽或許相逢老樹精

晚泊

洞庭波淼落帆輕小泊亭臯候月明遠火晚迴龍伯駕
荒蘆寒打鴈奴更閒依燈影吟情永未息濤聲旅夢驚
已字山形之字水擁衾先自算歸程

江行

風細江行緩中流日暮時遠帆如不動寒月故相隨已
水來三折湘雲望九疑從來騷客地遺跡令人思

古來咏明妃楊妃者多失其平戲作二絕

遠嫁呼韓豈素期請行似怨不逢時出宮始覺君恩重
臨去猶爲斬壽師

國朝集 卷三
輦鼓漁陽爲翠娥美人若在肯休戈馬鬼一死追兵綬
妾爲君王拒賊多

客興

天澹雲閒一色空道人於此得冲融細嘗水味參茶客
不識山名問柁公浪險占風爲進止路彎看日辨西東
垂竿卻笑江邊叟爲誰迎也鞠躬

順風歌

挂帆曉唱榜人歌知是南風轉綠波寒戀重衾人未起
已聞船底水聲多

連朝艤櫂洞庭邊一日開帆路半千此理眼前誰悟得
順風船卽阻風船

破浪雄心久淡忘無端又起意飛揚蔽江百道風帆下
想見龍驤指建康

深心最是老艚公勸客休爲顧盼雄正飽帆時江一曲
順風又作打頭風

甘將軍廟神鴉歌

江行曉過富池鎮片片亂鴉迎作陣拂浪如偕畫鷁翔
乘飈欲共相烏進榜人搏飯投向空饒口啞啞大逾寸
高低接食百不失眠疾機靈弗轉瞬有時旣飽坐檣竿
恰似倦旅便船趁傳是甘將軍廟中遣來相助蒲颿迅
將軍生平勇絕倫雄姿颯爽生威神燕頷自能飛食肉
鷹揚豈屑飢附人由來英鷲氣不散故應化爲健翮凌

秋旻獨是當日所部未有鴟兒軍既不聞雁子都以鳥
紀又不聞黑雲隊以色分胡爲身後統領萬鳥喙直欲
角勝水師驚鵜羣或云將軍賤時好劫掠負毘帶鈴人
被虐草竊幾同孫白鷄陸梁不減趙青雀卽今母乃故
智存猶布黨羽恣吞攫繫余只貪歸路遄朝來正值南
風顛長年驚喜謂神佑爭學低頭拜杜鵑鴉乎鴉乎果
能作使順風送行客固弗怪汝掠食荒江邊

赤壁

依然形勝扼荆襄赤壁山前故壘長烏鵲南飛無魏地
大江東去有周郎千秋人物三分國一片山河古戰場
今日經過已陳迹月明漁父唱滄浪

晚眺

江天宜曠望晏坐豁牕櫺漢水鴨頭綠楚山螺髻青詩
成裁短幅酒盡倒長甌日暮漁歌起餘聲入杳冥

夜泊漢口

一派晴江接漢川落帆風緊到堤邊繁星歷亂千檣火
幻市青紅萬瓦烟孔道舟車人似海中宵絃管月當天
經過別有雄繁意笑我何求也泊船

題黃鶴樓十六韻

傑構依天塹登臨氣象千危磯黃鶴浦重鎮赤烏年勢
控荆襄下兵從晉宋前舟車當四達海寓扼中權勝槩
斯稱最名區久未湮樓真千尺迥地以一詩傳百級旋

螺上重簷亂鼠穿憑欄俯斜日挂檻豎長川遠挹庾樓
月高凌郢樹煙江吞汜口濶城對漢陽堅佔船如浮鴨
漁槎有縮鮪陸放翁入蜀記過武昌買得縮項鮪重十斤洲猶芳草色笛正落梅天
事往皆成古吾來倘遇仙鴻泥留笠屐鯨浪少戈鋌燈
火沿流滿魚鹽入市闌翻疑騎鶴客多半在腰纏

鸚鵡洲弔禰正平

清狂早占晉人先亂世矜才豈善全一刺不曾輕出袖
三搥何事戲當筵禍因傲物同文舉跡亦依人愧仲宣
洲草千年鸚鵡綠長憐賦筆自翩翩

漢口發舟

一鎮塵囂湧市闌倦遊人愧獨蕭閒舟車北接長安道

風雨西來大別山尙有知交留酒醴

陳玉亭中丞留飲

已無詞賦

動江關只餘歸思如春水先到家門綠柳灣

臨臯亭

臨臯亭迥倚江隈玉局曾經謫宦來海內頻年傳死信
宮中深夜歎奇才江山故宅鴻泥在風月扁舟鶴夢回
到此始憐生也晚履綦不及一追陪

泊舟琵琶亭作

香山四十六七歲正是左遷江州日我今亦以鐫秩過
計年亦是四十七後先相距一千載浪跡偶然同一律
公之風流在天壤不但詩傳長慶集笑我區區腐儒陋
敢以鴻泥詡相匹獨疑公也本恬退蟬蛻塵埃慕堯率

龍門寺詩見雅尚曳尾泥中得要術匡廬在念貶九江
奇福已償塞馬失是宜快和廬山謠詎屑苦續屈騷筆
胡爲仍抱淪落恨商女歌前自陳述飄零身世感紅粉
老大年華傷錦瑟至今一片滄江清猶帶哀絳韻悽慄
繫余罷官返故園一棹來經吟抱膝身比虛舟傍岸歸
心如古井不波汨絕無佗條半點留此意迢迢默可質
琵琶亭子誰所立似寫當年座中泣詩成自覺太無情
雖有青衫不曾濕

江岸守風

歸路行將近荒江又泊船大風聲拔木高浪氣吞天悶
藉提壺遣危呼楸枰堅篙工爾何樂自盡正攤錢

廬山在望不及一遊詩以解嘲

鄉心連夕促歸舟
咫尺匡廬不一遊
千古香山暗相笑
此人枉自過江州

記得前身本遠公
何須履跡遍山中
不來五老峯邊坐
恐被人呼六老翁

信有坡仙是解人
教從象外見全神
先生不入廬山去
正爲看他面目真

遣悶

琵琶亭畔雨如絲
津吏攔江一纜維
檣轉相烏關未啓
好風偏在空閒時

奴僕聲聲怨石尤
先生一笑付浮漚
有風未必連朝逆

且向江干暫泊舟

遣興

雲濕江天鴈影孤
春風爲我送歸途
四宜休敢稱高士
七不堪難起懶夫
積歲刻成新楮葉
過時身比舊桃符
只慚招得旁人笑
顛倒天吳紫鳳圖

閒步江岍有邨翁
築屋數間蒔花籠
鳥頗有閒適之趣
戲題二絕

溪流曲曲柳絲斜
中有幽棲處士家
好个丹青行看子
黃筌禽鳥趙昌花

門前無數阻風舟
相對荒灘歎石尤
不抵此翁閒一笑
看他江水日東流

樓三舍人歌

鄱湖有神曰樓三舍人相傳明太祖大戰鄱陽
時敗艦有樓纜落水爲戰血所凝遂著靈異過
者必祀焉否則有風浪之駭事見庚巳編余過
湖口詢之榜人言頗合爰爲作歌

樓舍人誰氏子生自耕岡死左蠡傳是鄱陽大戰時斷
艦飄來沒於此當日明船白檣漢船赤不知爾是從王
抑從賊要其結束赴水師總欲勤宣濟川力心比橫江
鐵鎖堅功逾乘屋索綯亟旣維舟楫爲紆纒倘繫俘囚
當徽纆豈知一跌遽不振剩比沉沙半枝戟是時戰血
紅滿湖萬斛淋漓收不得鬱蟠盡向爾身聚助爾精靈

作奇特毅魄能兼萬鬼雄長身詎許羣龍食噫嘻乎舍
人既不能偕鄂號諸公共策勲克敵歸來蒙獎敕又不
能入康郎廟中享牢醴三十五人同繪刻徒然抱忠淪
九淵固宜冤憤氣填臆若敖其餒堪盡傷伯有爲厲肯
消泐毋怪靈旗颯沓日來往常作掀天怒濤黑忽如洞
庭君出驂文螭又如伍胥駕潮撼鼉極我過湖口歸江
東正值高浪摩青穹聊爲舍人一轉語勝國山河亦已
空如雲猛士骨俱朽獨爾虬髯蜩鬚何須雄且自收回
不平氣莫漫呼豨顚鵠號陰風

黃石磯

皇甫庸近峯聞畧記宸濠舉兵夜泊埭間所在

地名黃石磯愕然曰王失機將安歸乃旋師被
執焉亦見明史宋以方傳蓋攻安慶不克後廻
舟泊此而有是言非因此識語而始廻也舟行
過此爰紀以詩

黃石磯楚人音同王失機王失機將安歸浮江馬豈成
龍飛是時逆謀非一日遠近俱爲積威怵或言旦夕作
天子多少奸徒願扈蹕軍師劉養正丞相李士實復有
盜魁閔念四凌十一起事日期彷彿成祖陷客西瓜戮屍
出靖難兵起以六月十一日召百官食西瓜殺謝貴等
濠亦以是日出西瓜暗衆官殺撫臣孫燧等遂起師呼集蜂豺六萬人
直擣南畿迅雷疾經過皖口遭嫚罵逞怒留攻合圍密
忽聞巢穴已被傾倉卒廻舟救無術榜徨夜泊危磯旁

響卜驚魂動蕭瑟聚梨薑芥托隱語曾諷守臣示所嫉
豈知語識翻及身地名早報先機失未幾戰敗八字腦
樵舍就俘等雛匹惡徵果應鵲鳴簷噩夢真符蛇噉室
由來作計太狂謬身伏歐刀竟誰恤橫江千丈石磯黃
失路空期石敢當輸他燕子金陵郭靖難師來勢欲翔
獨餘一掬祭江血過客爭悲宋以方

宋以方被戕於
此川以祭江

小孤山

孤峰插崩濤日與雷霆鬪四旁嶄無附巖空一柱秀自
非千丈根安能植不仆級級勢累甃太古誰所斲風雪
久剝蝕石色積鐵透草木根其罅一一堅且瘦虬松乃
十圍焉知幾千壽中藏仙姝宮鑿翠闢戶牖妝成嬋娟

姿不作者老嫗皺居然大琳宇香火日奔奏小孤木非姑
何年字訛謬屈使作女身頗遂著霸佑乃知人心幻事
多憑虛搆及夫意造成鬼神亦俯就我來暫停舟正值
寒雨驟也疑行雲歸濛濛濕巘岫

將至安慶望皖公山不及十里忽風浪大作不能
進急收入小港

鵲首銀牙怒浪開乘槎便擬問蓬萊皖公忽似神山幻
咫尺天風又引迴

濤聲如沸撼長空月黑天低夜守風官燭滿堂消散盡
來分漁火一燈紅

皖口謁余忠宣公墓

表裏山河地必爭儒冠曾此守孤城嶺雲尙吐登陴氣
江浪如聞戰鼓聲世亂揭竿成巨寇時危橫草出書生
可憐橐橐降臣履千載應慚守廟情

江行

帆影依依帶落暉江平如鏡浪痕微舟憑野鷺爲前導
人與春鴻共北歸才薄敢期宣室召心閒早息漢陰機
居然已似漁翁長只未身披獨速衣

大通港守風遣悶

又是江干艤棹時歸程將近轉無期舫齋畫靜人枯坐
閒似灘頭白鷺鷺

避風長日泊江郵敢比鷗鷺寄爪痕已有旁人知退鷁

不將鐘鼓祭東門

枯蓬瑟縮耐蕭閒
老怯風波怕涉艱
曾憶壯遊年少日
浪花如雪過金山

憑將身世喻觀河
何處堪容放意過
屈指舟行五千里
順風常少逆風多

荻港道中

夾港重沙路幾灣
舫齋趺坐畫簾閒
水平風細舟行緩
看盡江南雨後山

守風日久盤餐不給詩以遣悶

久客愁金盡
風濤未有涯
歲支千石罷
日計百錢又已
歎食無肉兼
憐飯有砂
市蔬誰肯送
店酒不容賒
盈把

蒸醃菜連瓢破醬瓜點菹酸刺鼻噬腊硬聲牙敢望春
初韭休嫌雨後茶大烹惟板鴨細嚼到糠蝦粒爆灰中
豆根搥木際葭竹萌乾比鐵藕節老於槎入饌真難嚙
充飢或易咍憂同上嫂釜齋類太常家列鼎原無分炊
珠亦可嗟朶頤看雁鶩動色讀鱸鮓自顧癯如鶴人疑
瘦爲蛙議鮓空故事說餅祇虛誇忽憶家園樂能生七
鬯華河鮑肥似乳刀鱗潔無瑕鴨脚芹初茁貓頭筍正
芽儘堪供下箸何事尙浮鰲魚腹鄉書斷豬肝地主遐
戢翎隨啅雀張口尙饒鴉一笑涎流麴何殊癖嗜痴身
將營種秫業且托耕畬畦藥栽泥濕園葵摘露斜折鐺
煨楮柑叢棘織籬笆白石挑泉煮黃精帶雪耙長生方

辟穀輕舉術餐霞茹淡宜先演甘貧戒取奢豈須當饗
歎且自勸餐加本薄候鯖製兼忘官鮓嘉江干聊散步
寒餓看梅花

蠓磯靈澤夫人廟

危磯俯插滄江水一片貞魂招不起相傳魚復凶問來
玉骨冰肌此中死夫人生長吳宮中剛猛綽有諸兄風
侍婢執刀增慄慄幾笑大耳非英雄歸寧手自抱阿斗
亦見異母恩勤厚獨疑章武建號時何不迎回冊佳偶
伉儷殊無故劍情劉琨寡妻翻作后得非房閨餘威在
猶恐變故生腋肘

武侯云主公在公安近
慮孫夫人發生肘腋

我讀蜀志搜異聞沉

淵軼事無明文要知夫人性英烈自有一死留清芬貌

亭師敗聞應悸况堪更灑崩城淚生不能歸蜀道難此
水猶從巴峽至或者游魂可逆流欲問永安宮裏事杜
鵑啼罷血紛紛白帝城高國土分一樣望夫身殉處可
憐悲更甚湘君空江烟雨迷離合還似蒼梧日暮雲

燕湖鐵畫歌

畫家寫生尙沒骨專以柔媚矜技絕是誰巧匠能翻新
不用胭脂轉用鐵堅鎖入煅無礪砂鉗出爐燄紅于鰕
陰陽之炭文武火恍疑地窖烘唐花梅根蠟奇松節硬
故宜鑱鐫摹槎枒其餘或拗風枝颯或抽露葉垂橫斜
或魚魚游燕燕舞當空鱗爪紛盤拏視以素縠影浮動
映以絳蠟光交加燈之屏之挂虛室使我四壁生妍華

何哉頑鐵本粗醜乃令作繪替丹黝得非點鐵指嚼鐵
口否則卷舒鐵鈎手鍊得錚錚一寸剛化爲繞指軟如
柳廣平不以勁直稱魏徵轉因嫵媚取揉堅按銳出麗
藻笑他磨杵爲針硯成曰鑄鼎象物古所珍未有此法
傳後人我聞畫竹須用玉鈎鎖畫山最要丁頭皴想是
良工於此得妙悟遂以鐵筆來傳神丹青無光卷軸掩
論價貴值雙鳥銀從來一技精能名可擅沈錫張銅李
昭扇以鐵作畫尤未聞特爲藝苑開生面何不鑄取工
姓名流傳應過千年絹

牛渚磯

牛渚磯插江浪巢湖師來掉急槳磯頭矢石下如雨離

岸丈餘不得傍誰何健者常開平接戈大呼躍而上萬
衆披靡遂奔潰亟下太平勢批亢飢來就食未知名一
旦軍中出飛將殄漢滅吳驅殘元佐命勲高自茲邇當
其登壇建旗鼓十萬橫行赫威望危苦乃在奮跡日搏
兎勝於搏巨象至今百尺危磯旁想見拏舟氣跳盪我
來幸值承平時折戟沉沙久消蕩江空波浪無鯨吞夜
靜菰蒲有漁唱且咏青蓮五字詩馬槩功名非所尚

金陵

不到金陵廿六年白門烟柳故依然多情丁字簾前水

還向秦淮引客船

自丁卯以秋試至
屈指廿六年矣

剪燭風簷夜漏長少年曾此賭身強不堪老作歸山客

重過生平舊戰場

歷歷千年跡未消興亡局似去來潮道人綺習刪除盡
不蘸胭脂寫六朝

金川門懷古

前史曾傳靖難兵麾戈從此據神京
削藩禍起書生計負展圖慚叔父名
一領袈裟宵出竇九江統綺曉翻城
興師若不論成敗高煦宸濠豈異情

千屯火照雉樓紅想見當年勢勇
訐折矢不臣黃鵠子

李白詩魯連黃鵠子

打鐘竟帝白鳬翁

北齊武成事見北史

從亡亡屬千山險駢

戮歐刀十族空養士甫經三十載何因
義烈滿寰中

守風登燕子磯

歸人澹無事扁舟任容與天子遊山緣到處被風阻今
朝燕子磯策杖躡孤嶼曲徑依山轉白雲無定所蒼然
古木深隔林有人語一亭圓如笠絕頂俯江渚霞邊夕
陽明千里見不楚天風浩浩來波浪大如許千檣傍岸
泊爭歎滯行旅中有忘機人澹然對鷗侶

題永濟寺

一院紅梅正試春來尋野衲話禪真屋隨巖轉如螺旋
僧閱年多解鳥伸題壁空留當國老寺有熊張陳鄂
五相公碑版名山終
讓出家人羨他日對滄江住閣盡無事不問津

舟至黃天蕩北風大作迴泊燕子磯

打鼓朝辭燕子磯蹴江雪浪撲人衣黃天蕩裏迴舟處

笑比蘄王戰敗歸

本是人間一退翁
故宜路鬼戲途窮
若非反走回頭路
那得輕帆挂順風

歸擬苔磯把釣竿
長途偏使阻風端
日攜兒女扁舟住
先當浮家泛宅看

重向招提一挂簾
回廊曲磴轉層層
老僧不管人風浪
自向禪堂點佛燈

江干晚步

長隄曲曲繞平沙
徐步聊當下澤車
枯樹萬鴉棲似葉
荒蘆羣雁宿爲家
寒連殘臘遲春色
晴卜明朝爲暮霞
小憩偶然清興愜
江邊風浪正無涯

曉過儀真

九日江干住今辭燕子磯浪隨殘雨盡船趁退潮歸孤
月寒相照閒雲澹不飛到家堪計日猶及試春衣
經旬歎留滯喜見片帆開天塹終難限風輪也有迴波
痕縠細縠曉色淨纖埃隱隱金山寺遙迎鵲首來

送馬沅亭歸里兼寄邵耐亭

萬里相隨久歸仍共一艎詩多成笈束人瘦似梅花客
窘慚爲主途長喜到家憑君先寄語一問邵平瓜

薄灣曉發

邪許喧開櫂冥濛一望中江雲殘夜黑海日五更紅巢
鶻驚棲戛潮雞喚舞雄當年曾擊楫慚愧漸成翁終